

DANAS - #503

Psalmi su pjesmarica Starog zavjeta. Mnogi Psalmi su ispunjeni slavopojima Bogu. 95. je jedan takav Psalm. Obiluje slavopojima i zahvaljivanjem. Razmatraćemo 7. i 8. stih 95. Psalma. Evo kako oni glase, „Jer on je naš Bog, a mi smo narod njegove paše i ovce njegove ruke. Danas ako čujete njegov glas, ne otvrdnite svoje srce kao u Meribi, kao u dan Mase u pustinji.“

Bog vas zove danas! Želim naglasiti da vas zove danas – upravo sada! Često ljudi odugovlače. Odgodiće nešto do trenutka kada su spremni da se suoče s tim. Važnost ove poruke je u tome da se Bog želi pozabaviti vama danas. Postoji poruka od Boga za vas danas. On će vam govoriti kroz ovu emisiju. Govoriće vam kroz svoju Riječ. Važno je prepoznati da Bog može iskoristiti bilo koji trenutak, ovaj trenutak sada, da vas dovede u odnos s njim.

Volim priču koju je ispričao Bili Grem na velikoj evangelizaciji 1986. godine u Amsterdamu. Jedan luteranski pastor iz predgrađa Čikaga odlučio je da ode na tu evangelizaciju. Brinuo se za malu parohiju i mislio je da mu ne bi bilo na odmet da sazna nešto o evangelizaciji. Tamo je bilo oko 8 ili 9 hiljada ljudi iz cijelog svijeta. Prvog dana se osjećao pomalo usamljenim. Pitao se šta tu radi. Sjeo je za sto za kojim je sjedio jedan Južnoafrikanac. I on se pitao šta tu radi. Počeli su razgovarati za ručkom i shvatili da isto misle. Tako su odlučili da se drže jedan drugoga i zajedno idu na propovijedi. Postali su dobri prijatelji u tih nekoliko dana. Nakon konferencije, kada se mladi pastor vratio u svoju parohiju u predgrađu, odlučio je pozvati svog prijatelja iz Južne Afrike da ga posjeti. On je došao i govorio članovima parohije. Pitali su šta oni kao parohija mogu učiniti za njega u Južnoj Africi. Rekao je da ima nešto što bi im trebalo. Mala crkva. Ima ih 77-oro koji se okupljaju da slave Boga. Ali mogli bi mnogo toga više uraditi da imaju malu crkvenu zgradu. Luteranski pastor i njegova crkva su ga pitali koliko misli da bi koštala gradnja crkve. Kako bi se to sve moglo izvesti? Južnoafrikanac je odgovorio da misli kao bi se sa 2 ili 3 hiljade dolara mogla izgraditi lijepa crkva u njegovom selu. Neki članovi parohije koji su znali ponešto u vezi gradnje odlučili su da odu tamo i izgrade crkvu. Njihova crkva će snositi sve troškove. I tako je crkva izgrađena. To je bilo 1987. godine. Ovo je istinita priča. Trinaest godina kasnije – 2000. godine – ta mala crkva u Africi osnovala je 23 nove male crkve. Dakle, 24 crkve ukupno sa 11 hiljada članova. Nevjerovatno, zar ne? Od ove dvojice ljudi koji su se sreli 1986. godine na konferenciji, pokušavajući naučiti nešto u vezi evangelizacije, Bog ih je uvećao i blagoslovio na 24 crkve

sa 11 hiljada ljudi. Pogledajte kako Bog može upotrijebiti jedan slučajan susret i uraditi nešto danas. Bog je uradio nešto tog dana i nastavio raditi u njihovim životima.

Znam za još ovakvih priča. Mislim da je glavna poenta u tome da ja želim da vi slušate veoma pažljivo danas.

U našem tekstu piše, „ako čujete njegov glas.“ Kada čujete Božiji glas, u zavisnosti od toga gdje se nalazite u vašem odnosu s Bogom, možete čuti različite stvari. Npr., možete čuti veoma autoritativan glas. Možete čuti Božiji glas koji vas zove na pokajanje. Može izazvati grižnju savijesti. Možete reći, „Bolje da dovedem u red svoj odnos s Bogom, možda više nemam vremena.“ Gledate nesreće, patnju, bol i jad oko vas i shvatate da biste to mogli biti vi! Bolje da imam dobar odnos s Bogom. To može biti grubi glas koji zove na pokajanje.

Ili ako čujete Božiji glas danas, dok vam govorim, možda ga čujete kao umilni glas. Možda vas Duh Sveti izbavlja iz očaja. Možda ste u očaju danas. Možda ste u tuzi danas. Osjećate li se izgubljenim? Slušajte! Bog dolazi u vaš život i kaže, „Mogu ti dati mir! Mogu ti dati oprostjenje i novu nadu.“ Da li smatrate ovo nježnom i utješnom Božijom Riječju? On će biti vaš Spasitelj! On će vam dati sve što vam je potrebno! On želi da vas dovede u odnos s njim!

Možda se osjećate potišteno – shrvani poteškoćama. Nadam se da ćete, dok slušate Božiji glas kroz ovu poruku, doživjeti taj glas kao glas sile. Vidjećete da je u stanju da vas promijeni. Ustvari, samo vas Bog može promijeniti. Toliko je stvari koje su komplikovane i izazivaju ovisnost da svojom snagom ne možemo uspjeti. Ponekad izgleda uzaludno. Poslušajte ovaj Božiji glas, ovu Božiju poruku. On je svemoćan Bog. On je u stanju da promijeni živote. On je u stanju da promijeni situacije. U njegovoj ljubavi će to uraditi za vas. Predajte mu svoj život.

Neka to bude glas sile, radosti, ljubavi i autoriteta. Čujte Božiju Riječ danas, na bilo koji način. Na kraju 7. i 8. stiha 95. Psalma piše, „Ne otvrdnite svoje srce!“

Siguran sam da bi prvo pitanje bilo: Kako možete otvrdnuti svoje srce? Mnogo je načina na koje ljudi mogu otvrdnuti svoja srca. Jedan način je reći da ne želite čuti ovu poruku. Neki ljudi isključuju radio. Neki ljudi ne žele čuti ovo. Ne žele se mijenjati. Ne žele zamarati svoju savjest. To je jedan način da se otvrdne srce. Kada Duh Sveti počinje raditi u vašem životu i

kada osjećate onaj trzaj u vašem srcu i potrebu da se mijenjate, tada vas on smekšava i stavlja u kalup. Ako nastavite ovo slušati, Bog će vas mijenjati. Neki ljudi žele otvrdnuti svoje srce i odbiti da se mijenjaju. Vidio sam da se to dešava u crkvi. Strašno je vidjeti kada ljudi otvrdnu svoja srca. Odbijaju slušati i pokajati se. Odugovlače! To je još jedan način da otvrdnete vaše srce. Reći, „Ne, ne sada.“ To je zastrašujuće. Želim se vratiti na naglasak riječi danas. Ne volim prastare ilustracije. Jedva da ih ikad koristim. Ali, dok sam pokušavao naći ilustraciju kako bih zaokružio ovu misao, našao sam jednu o kraljici Elizabeti. Pred samu smrt, bila je toliko paranoična i plašila se smrti da nije htjela ići u krevet. Naredila je svojim sluškinjama da stave jastuke na pod i ona bi zadrijemala na njima. Užasno se plašila da će umrijeti ako ode leći na krevet. Stalno je govorila „Ponovo recite vrijeme“. Ne znam tačno značenje ove rečenice – da li je neko naglas govorio vrijeme jer je željela čuti koliko je sati ili je to bio način na koji je govorila da bi željela više vremena. A onda je rekla ovo, „Bogatstvo za djelić vremena.“

Mi ne znamo koliko nam je još vremena ostalo. Život je jako kratak. Želim da ovo shvatite kao hitnu molbu. Čujte Božiji glas dok vam govori. Nemojte otvrdnuti svoje srce. Čitajte 95. Psalam i tražite njegovo vodstvo.